

Rome, 26 septembre 1601.

Nicol. Christoph. Radziwil

/ Illustrissime Princeps. Ego Dominationem V. Ill^{mam} pignoribus
 meis onerare dicor: re autem ipsa vestris pignoribus, iisque nobilissimis oneror. Et quamquam agnosco in his muneribus propensionem erga me vestram, et gratias, ut par est, ago; tamen propositum mihi est,
 5 vacuas manus à muneribus ~~gere~~, atque hactenus pretiosa dona principum Virorum recusavi, vel remisi: quod meum institutum cum D.V. servare nolui, nè tam procul pretiosae illae pelles reportandae essent. Sed obnixè rogo, ut si me amat, talia ampliùs ad me non mittat, nisi velit ea à me distrahi, et pretium pauperibus erogari: quod et ^{de} his,
 10 quae nunc misit, facere cogito. Georgium Alexandrum familiarem Illustrissimae Dominationis vestrae libentissime vidi, et negotia, quae perficienda detulit, optima voluntate complexus sum. Quod attinet ad plenariam Indulgentiam; Sanctissimus Dominus Noster jam dudum decrevit non esse concedendam deinceps, nisi maximis ~~de~~ causis. Itaque
 15 Cardinali Matthaëio, qui primus, ut inter nos conveneramus, de hac re mentionem fecit, Summus Pontifex praecisè respondit, indulgentiam aliquam libenter se daturum, sed non plenariam. Reliqua negotia, quae per Dominum Marcellum Vestrum Secretarium expedienda erant, brevi, ut spero, conficientur omnia: nam idem Secretarius tum à Cardinali Mat-
 20 thaëio, tum à me rogatus, ea se quamprimum expediturum promisit. Laudo pietatem, et religionem animi vestri, quae spirat in iis, quae à Summo Pontifice tanta sollicitudine postulatis, et de qua cum ab aliis multis, tum ab hoc ipso Domino Georgio Alexandro certior factus sum. Deus optimus maximus eam pietatem in pectore vestro confirmet, et au-
 25 geat. Valeat Illustrissima Dominatio vestra, et mea opera, si qua in re opus fuerit, libere utatur. Romae die 26 Sept. 1601.